

1981-V-29

Donostiako Diputazio jauregian, 1981.eko maiatzaren 29an, Euskaltzaindiak arratsaldeko lauretan hasi du hilabeteko batzarra. Bildu dira: L. Villasante buru, J. Haritschelhar buruorde, P. Altuna, J. L. Davant, J. Hiriart-Urruty, E. Knörr, F. Krutwig, P. Lafitte, E. Larra, L. Mitxelena, F. Ondarra, J. San Martin eta J. M. Satrustegi euskaltzain jaunak; N. Alzola, J. A. Arana, M. Atxaga, I. Berriatua, P. Charritton, J. Estornes, X. Garmendia, P. Goenaga, J. Goikoetxea Maiza, X. Kintana, J. A. Letamendia, J. L. Lizundia, X. Mendiguren, A. Zatarain eta J. J. Zearreta euskaltzain urgazleak, J. M. Satrustegi idazkari dela. X. Diharce eta P. Larzabalelek ezin etorria adierazi dute.

Ohi den otoitzarekin hasi da batzarra.

Ibon Sarasola euskaltzain urgazle jaunak, Bartzelonan doktoradutza eskuratu berria duela jakinerazi du idazkariak, eta T. Peillen jaunak Bordelen.

GOIZEKO BILKURAREN BERRI

Euskaltzain osoek goizean egindako bilkuran Euskaltzaindiko Barne Errelak aipatu dira. Zuzenketak zertan diren ikusi ondoren, Araudiarekin batera liburuska argitaratzea erabaki da.

Batzordeetan diren zenbait lagunen izendapenak egin dira. Lehenengo aldi honetako zerrenda hau da: J. M. Aleman, A. Aranburu, A. Ariznabarreta, G. Aurrekoetxea, M. Azkarate, R. Badiola, G. Elorza, A. M. Etxaide, J. M. Etxebarria, J. M. Etxezarreta, J. L. Goikoetxea, R. Iraola, M. P. Lasarte, A. Muniategi, I. Usabiaga eta Ch. Bidegain.

Batzordeetan lanean ari diren bitarterako epez mugaturik daude izendapen hauek.

Altsasuko aita kaputxinoen zuzendariari, Debako Udalari, bertako Ostolaza elkargoari, eta beren laguntza eskaini ziguten beste talde batzuei esker ona agertzea erabaki da.

BATZORDEEN AZALPENAK

Dialektologia batzordeak lanen egoera aztertu du. Debako ikastaroa aberatsa izan dela ikusi ondoren, asmoak aurrera eramateko itaunketa beharrezkoena da. Zerrendak lehenbailehen egiten arduratuko dira. Ekintza honetarako diru laguntza Eusko Jaurilaritzak emango duela esan zaie.

Gramatika batzordearen berri Patxi Goenagak eman du. J. Urangak bere txostena aurkeztu omen du eta orain artekoak zabaltzeko gertu dira. Datorren kongresorako gramatika oinarriko bat gertatzerik balegokeen galdetu zaio. Zer eratako lana aurkeztu nahi den jakin beharko dela, erantzun du. Sintasia aztertu gabe dago.

Euskal Literatur batzorde bat gertatzeko oinarriak aurkeztu ditu F. Krutwig jaunak. Herri Literatura izan du Euskal Herriak, eta bestalde, Filologia. Bi bien arteko Literatur jantzia behar du; goi mailako sorketako literatura. Mezu zabal baten antzera egin duela oraiko agerpena, eta xehetasun gehiagorekin burutzeko asmoa agertu du.

BESTE BERRI BATZU

J. Haritschelhar jaunak erromantizismoa eta erakunde ttipiko hizkuntzen eragina gaitzat harturik, Frisian egin berri den kongresoaren aipamena egin du. Etxahun erromantiko mailan agertu zuen berak. Rene Laffon jaunarekin agertu zen gero mahai inguru batean, eta Iparragirre ere aipatu zuten han, olerkari nahiz abertzale mailan. Lokarriak sortu direla esan du.

F. Krutwig eta J. San Martin izan dira bestalde, Toledon egin den Ifar eta Iberietako erakunde ttipidun hizkuntzetako literatur jardunaldian. Harreman onak izan direla esan dute, Palman egitekoa den kongreso zabalago baten oinarri.

Israelen Oroimenari buruz egitekoa zen kongresoa atzeratu dela, dio idazkariak. Datorren ekainaren 28an hastekoa zen, bainan, hango giroa ez da egokia.

Datorren hilabeteko Euskaltzaindiaren batzarra Archu zenaren oroigarriz, Altzürükün egingo da, 'Su Azia' elkartekoen laguntzarekin. Beraz, ekainaren 27 eta 28an egingo diren ospakizunen berri eman du J. L. Davant jaunak.

P. Altunak "Manual Debozinezkoa" argitaratu berria aurkeztu du.

Azkenekotz, EUSKERA aldizkariaren azken alea banatu da batzartuei.

Eta besterik gabe amaitu da gaurko batzarra.

Euskaltzainburua

L. Villasante

Idazkaria

J. M.^a Satrustegi